

Siôr Vescul,

j vevi zà scrit un viac. Mi visi come cumò: ai 29 di jugn dal '74, che di ch'o finivi nûf ains di predi. No sai se j à zovât o no. No ài nissun carisma par insegnâj al gno vescul a fâ il so mistîr. Mi à parût dome un dovê di predi disj ce ch'o pensavi, dato che, par cumò, o soi ancjmò dentri tal predessam di cheste Glesie.

Se un mi domandàs vuè, dopo cuatri ains ch'al è cun no, ce ch'o pensi dal vescul, ch'al mi crodi, no savares ce rispuindj. Denant di Diu Lui al varà il so sac di disvuedâ e jò no mi permetarai mai di jentrâ te cussiense di un âtri. Jò o scuen fermâmi fûr de puarte, a ce ch'o viôt. Poben, di ce ch'o ài vedût no savares dî se Lui al va o se nol va gran.

Giescj pusitîfs a'nd'â ancje fats e no si pò dineâju: s'a fos dome la semblèe dai predis. Però a ogni pas indenant o vin viodût un o doi pas indaûr. Pa la cuâl, cun dut il rispîet, nus à parût che il So al fos il lâ indenant di un che nol à fermece nè tignince. Un lâ indenant e indaûr ch'al finîs par ingomeâ vecjos e zovins, di gjestre e di çampe. Forsit Lui al sarà preparât, dentri di sè, a cjapâlis di ducj, par ascetiche ma nol è chest il discors. A nô no nus intaresse un vescul ch'al vadi su la spice dal paradîs, ma un vescul che nus diregi, che nus deti une man par lâ indenant e no par finî di inbarlumînus. J al vevi scrit a Zui, ai 28 d'avotst dal '74. Si visial? Il pastôr al à di sielgi e nol pò lâ indenant come i cjocs. Mi semèe che il so troi al seti propit chel!

Lui, mi semèe, al à doi carûi o balîns o preocupacions: no sconsortâ nissun e no rompi la cumunion.

Riguart al prin, chel di no vê nissun cuintre e di contentâ ducj al è ingjenuo s'al crôt di rivâ adore di cumbinâ dut cun tune pache su la spale e cun tun gustâ tal palac. La Glesie, s'a no ûl diventâ un simiteri o une caserme, e à di vê dentri di sè tantis di ches difarensis che la int e à di restâ a viodile tant unide e tant difarente. La diviersitât e jè la robe plui bieles che il Spîrit al semene te so Glesie. Invessit ch'è di Rome, ven a staj la Sô, e ûl ve dome un savôr! Ch'è di nô o vin predis fassiscj o democristians (un novante par cent) e cheâtris si dividin fra extraparlamentârs, cence partît e moviment Friûl. I predis fassicj-democristians no vuelin pulitiche, dome vanseli., come che àn fat simpri lôr tant sul pulpît che pes cjasis come ancje sul gjornâl catolic ch'al confondeve la religjon cu la DC. Lui, tocje dî la veretât, no nus à dit di votâ pai demos. Però al à riguart che j disin ch'al è dal MF. Parceche cui predis o si è democristians e cul pape o si è eretics. Ma ur fasie tante pore un partît furlan che nol è nancje marcsist? Nol va cuintri di nissune veretât di fede. Al ten dome pal Friûl. E Lui al à pore che j disin ch'al ten pal Friûl? Parcè? Varessial di jessi cuintri di che int ch'al è vescul? A, ma Lui al dîs che no si à di fâ pulitiche. Brao! Se la Glesie no fâs pulitiche, le fasin ben cheâtris e ancjmò cuintri de biade int! Parceche cuant che la Glesie e tås, cuant che il vescul e i predis e tasin, i grancj e i lôfs a fasin stragjo des pioris. E nô o varessin di tasê par che no disin ch'o fasin pulitiche! Pilatos! Cheste neutralitât e jè la carognade plui grande ch'a vetin inventade, parceche j dà une man a di chel ch'al à il podê. E devente *instrumentum regni*, parceche, come ch'a dîs la Sô teologhe, "*melior est condicio poasidentis*", ancje in pulitiche. E alore, si puedie tasê? E s'o tasin, cui fevelarâjal par nô? Ce stino a fâ?